

四庫全書

子部

欽定四庫全書

太平御覽卷五十九

宋 李昉等 撰

地部二十四

水下

水下

晏子曰景公問廉政何如對曰其行水也美哉水子其
濁無不塗其清無不掃

楊子法言曰或問進曰水或曰為其不舍晝夜與曰有

是哉滿而後漸者其水乎

李軌注曰水滿坎而後進博學而後仕

瑞應圖曰共工氏受水瑞百官師長以水為號蒙水瑞水也君乘土而王其政太平則蒙水出於山焉

韓詩外傳曰夫水者緣理而行不遺大小似有智者動而之下似有禮者踏深不疑似有勇者障防而清似知命者歷險致遠似有德者天地以成羣物以生國家以寧萬事所平此智者所以樂於水也

吳氏春秋曰伍子胥奔吳至漂陽漂陽女子擊縹瀨水之上子胥過跪而乞食女子簞食壺漿而飯之子胥食而去謂女子曰掩子壺漿勿令其露女子曰行矣子胥行五步還顧女子已自投瀨中後子胥伐楚師還過漂陽瀨上欲報以百金不知其家乃投金瀨水而去後有姬行哭而來曰吾女年三十不嫁擊縹於此遇窮人飯之恐事泄投水而死乃取金歸

物論曰所以立天地者水也夫水也者本也吐元氣發

日月經星辰而興

又曰九州之外皆水也余昔在會稽仰看南山見雲如瀑練方數十丈其聲礧礧湏臾山下居民驚駭洪水大至

列仙傳曰負局先生上吳山語下人吾欲還蓬萊山為汝曹下神水岸頭一旦有水白色從石間下飲之多愈疾

楚詞曰滄浪之水清可以濯吾纓滄浪之水濁可以濯吾足

玄中記曰天下之多者水焉浮天載地高下無不至萬物無不潤

山海經曰剡山有獸焉名曰合窳見則天下大水高簡之山其上有水焉甚寒而清帝臺之漿水也

郭璞注曰河東解縣

櫓道山有水潛出山上俗名曰鵞漿即此類也

大荒之隅有山而不合名曰不

周有寒暑之水

又曰譙明之山譙水出焉而西流至于河其中多河羅之魚一首而十身

又曰少陽山酸水出焉東而流至于汾水其中多美楮

管子曰上有楮下有鐵

水經注曰鬱水即夜郎豚水也漢武帝時有竹王興於豚水有一女子浣於水濱有三節大竹流入女子足間推之不去聞有聲持破之得一男兒遂雄夷濮氏竹為姓所捐破竹於野成林王祠竹林是也王嘗從人止大石上命作羹從者白無水王以劍擊石出水今竹王水是也

又曰趙人有琴高者以善鼓琴為康王舍人行龐涓之術遊浮碣郡門二百餘年後入碣取水龍子與弟子期曰皆潔齋待於水傍果乘赤鯉出入碣中有萬人觀之留月餘復入水也

又曰姜水按世本炎帝姜姓

帝王世紀曰炎帝神農氏其母曰似遊華陽感神而生炎帝長於姜水

又曰昔沫水自蒙山至南安而溷崖水脚漂疾破害舟

船歷代為患蜀郡太守李冰發卒鑿平湫崖河神鼎怒
冰乃操刀入水與水神鬪遂平湫崖通水路開處即水所
穿也

又曰黃水出夏陽縣西北連巫山溪出雄黃頗有神異
採之常以冬月祭祀鑿石深數丈方得雄黃故溪水取
名焉

又曰沁水南歷猗氏又南與鷓鷯水合水出東北巨
駁山乘高瀉浪觸石流響世人因聲以稱之

又曰池郡魚復縣夷水即假山清江也水色清照十丈蜀人見其澄清因名清江焉

又曰漆水出浮石嶺北青衣山亦謂之青衣水也

又曰廬山之北有石門水水出嶺有雙石高竦其狀若門因有石門之名焉水導雙石之中懸流飛澍近三百步許下散漫十步許上望之連天若曳飛練於霄中也又曰永昌郡有蘭蒼水出西南博南縣漢明帝永平十二年置博南山名也縣以山名之其水東北流出博南

山漢武帝時通博南山道渡蘭倉津土地絕遠行者苦之歌曰漢德廣開不賓渡博南越蒼津一渡蘭倉為他人山高四十里蘭倉水有金沙越人收以為黃金又有充珠穴穴出光珠又有琥珀珊瑚黃白青珠也

荊州記曰夏首東二十里有涌口二水之間謂之夏洲首尾七百里華容監利二縣在其中

楚詞曰過夏首而西浮郭仲產云此水冬斷夏通因名夏水

述異記曰睢渙二水波文皆若五色其人多文章故名績水

又曰漢沔會流處岸上有石銘云下至水有三十里皆傳李斯刻石於此

龍魚河圖曰玄洲在北海中地方三十里去南岸十萬里上有芝草玄澗澗水如蜜味服之長生

淮南子又載也

萬震南州異物志曰天竺有恒水一號新陶水水特甘香下有真鹽也

廣志曰臨川郡有粉水得其水汰粉益潔

盛弘之荊州記曰陽縣西有粉水源出房陵縣取其水為粉鮮潔異於餘水故因粉為名也已郡臨江縣有此水舊常獻之也

韓詩外傳曰溱與洧三月桃花水下之時衆士女執蘭祓除鄭國之俗三月上巳之日此兩水上招魂祓除不祥也

秦州記曰成紀縣有石臼中水深數尺水旱無增減故

名其地為天水郡

搜神記曰漢末零郡太守有女悅門下書佐使婢取書
佐飲餘水飲之有娠而生子至能行太守抱兒使求其
父兒直上書佐膝書佐推之兒仆地為水

三齊畧記曰康浪水在齊城西南十五里康衢州甯戚
扣牛角歌於此也

述征記曰臨淄牛山下有女水齊人諺曰世治則女水
流世亂則女水竭慕容超時乾涸彌載及宋武北征而

激洪流蕩

又曰梁鄒城西有籠水云齊孝婦誠感神明湧泉發於室內潛以績籠覆之由是無晷汲之勞家人疑之乃待其出而搜其室試發此籠而泉遂湧流漂居宇故名曰籠水

始興記曰林水源中有石室室前磐石上行羅千竈中悉是餅銀採伐遇之不得取取必迷悶

名山畧記曰僧權道人居晉安霍山晨出澗忽見白水

異常飲之甘如醴水過甚迅疾取得少許以餉陶晉安
不復中飲權壽百三十歲不知其終

盛弘之荊州記曰桂陽郡有國水一邊冷一邊暖冷處
青且清暖處白且濁

隴石記曰武都紫水有泥其色亦紫而粘貢之用封璽
書故詔誥有紫泥之美

方輿韶州記曰曲江縣修仁水西南注連水北有三楓
亭五渡水齊范雲為始興太守至修仁水酌而飲之賦

詩曰三楓何習習五渡何悠悠且飲修仁水不挹偕和流

吳錄地理志曰天門零陵縣有溪水山獸從數十里往飲

廣志曰弱水不勝毛羽世無見者

博物志曰水有濁有清河淮濁江漢清南陽有清冷之水丹水泉水汝南有黃水華山南有黑水天下之水皆類五色今載其名也汙水不流

郡國志曰隆州析五縣置果州閬中有陰水其民銳氣而酣舞也

又曰湓水昔有人此處洗銅盆水暴漲失盆乃投水取盆見一龍銜盆奪之而去故曰湓水

又曰藍田灞水滴漏若以金銀銅鐵器盛之皆漏唯匏葉則不漏人掌中亦漏服之

關

毛得仙

論衡曰陽燧取火於日方諸取水於月天地之間巧歷所不能與其數乎然以掌搏之中引類於太極之上而

水火可立至者陽陰固相動也

異苑曰孫權赤烏八年遣校尉陳勲漕句容中道鑿破
窖掘得一黑物無有首尾形如數百斛船長數十丈蠢
蠢而動有頃悉融液成汁時人莫能識得此之後獲泉
源咸謂是水脈每至大旱餘瀆皆竭唯此若巨海焉

水災

書曰上天降災下民昏墊

又曰湯湯洪水方割

湯湯流貌
水割害也

蕩蕩懷山襄陵浩浩

滔天

傳曰凡平原出水為大水

史記曰秦武王三年渭水赤三日昭王三十四年渭水

大赤三年

洪範五行傳曰赤者火色也水盡赤者以火
沴水也渭水秦大川也陰陽色亂秦用嚴刑

敗亂之
象見也

漢書五行志曰高后三年漢中南郡水出流六千餘家

南陽沔水流萬餘家是時女王主獨治諸呂相王

續漢書五行志曰桓帝永興三年彭城兩水逆流永壽

元年洛水溢至津城門漂流人物是時梁冀爭政嫉害忠直後遂誅滅

獻帝建安二年漢水溢害人物是時天下大亂

古今注曰安帝延平六年河東水化為血元初二年潁川襄城臨水化為血不流

京房易曰君酒於酒淫於色賢人潛國家危厥異流水赤

救水災

史記曰堯命鯀治水九載功績不成

謝承後漢書曰沛國陳宣字子興建武十年雒水出造天津城門或欲築塞之宣諫曰昔王尊正身金隄水退况聖主耶言未絕而水去

范曄後漢書曰公沙穆銳思河洛推步之術永壽元年雨大水三輔以東無不漂沒穆明曉占候乃預告令百姓陟居高地故弘農人獨得免災

又曰任文公巴郡人也為治中從事時天大旱白刺史

曰五月一日當有大水其變已至不可防救宜令民吏預為之備刺史不聽文公獨詣大船百姓或有信文公頗有防者到其日旱烈文公急命從載白刺史刺史不信至日中雲起須臾雨至晡時湍水湧起十餘丈突壞廬舍所害數千人

淮南子曰古者水為民害禹鑿龍門辟伊闕平治水土使民得陸處百姓不親五品不遜契教以君臣之義父子之親夫婦之別長幼之序田野不修民食不足后稷


乃教之辟地墾草糞土種穀令百姓家給人足故三后
之後無不王者

謂夏殷周

有陰德也周衰禮義廢孔子以三

代之道教尊於世其後繼嗣至今不絕者有隱行也

又曰往古之時四極廢九州裂水浩漾而不息於是女
媧積蘆灰以止淫



太平御覽卷五十九

欽定四庫全書

子部

太平御覽卷

六十至
六十五

詳校官侍讀學士

臣沈咸熙

貢外郎

臣

牛稔文覆勘

總校官降調編修

臣

倉聖脈

校對官中書

臣

袁文邵

謄錄監生

臣

李克文

欽定四庫全書

太平御覽卷六十

宋 李昉等 撰

地部二十五

海

江

海

釋名曰海晦也主承穢濁其水黑而晦也

說文曰海天池也

書曰江漢朝宗于海

禮記曰三王之祭川也皆先河而後海

又曰洗之在昨其水在洗東祖天地之左海也

禮斗威儀曰君乘土而王則海夷

海夷水不揚波也

論語子曰道不行乘桴浮於海

公羊傳曰河海潤千里

河海出雲及千里

春秋感神符曰后妃恣則澤為海

春秋考異郵曰黃星騁海水躍宋均曰黃星土精土主

安靜躍則失常

史記曰天不足西北星辰西北移地不足東南以海為池也

漢書曰霍去病擊匈奴封狼居胥山登臨瀚海

如淳注曰北海也

謝承後漢書曰汝南陳茂嘗為交趾別駕舊刺史行部不渡漲海刺史周敞涉海遇風船欲覆沒茂拔劍訶罵水神風即止息

晉書曰鮑靚為南海守嘗行部入海遇風飢甚聚白石

煮食之以濟

又曰李涓遼東人祖敏海溪河內太守去還鄉遼東太守公孫度欲強用之敏乘輕舟浮海莫知所終

王隱晉書曰慕容皝上言曰臣躬征平郭遠假陛下天地之威將士竭命精誠感靈海為結冰凌行海中三百餘里臣自立國及問諸故老初無海水冰凍之歲

韓詩成王時越裳氏重三譯而朝天下不逆風不疾雨海之不波溢三年矣中國必有聖人

老子曰江海所以能為百谷王者以其善下也

列子曰渤海之東不知幾萬億里有大壑無底之谷名

曰歸墟

張堪註曰莊子云尾閭也

莊子曰東海之鼃謂坎井之鼃曰夫海千里之遠不足以舉其大千仞之高不足以極其深禹之時十年九潦而水弗加益湯之時八年七旱而涯不加損夫不為傾覆推移不以多少進退者此蓋東海之樂也

又曰南海之帝為儵北海之帝為忽中央之帝為渾沌

儵與忽時相與遇渾沌之帝渾沌待之甚厚儵與忽謀報渾沌之德曰人皆有七竅以視聽食息此獨無有嘗試鑿之一日鑿一竅七日而渾沌死

又曰接輿曰其于治天下也猶涉海鑿河而使蚊負山也又海水三歲一周流波相薄故地動

又曰周顧視車轍有鮒魚焉曰我東海之波臣也君豈有斗升之水活我哉

又曰北冥有魚其名為鯢化而為鳥其名曰鵬將徙于

南溟水擊三千里

又曰秋水時至百川灌河渚涯之間不辨牛馬河伯欣然自喜以天下之美為盡在已順流東行至于北海東面而視不見水端向若而歎北海若曰井蛙不可以語于海者拘于墟也夏蟲不可以語于冰者篤于時也曲士不可以語于道者束于教也天下之水莫大於海萬川歸之不知何時止而不盈尾閭泄之不知何時已而不虛春秋不變水旱不知此其過江河之流不可為量數

司馬彪曰尾閭水之從海泄出者也

文子曰古之善為君者法海以象其大注下以成其廣
淮南子曰賁星墜而渤海決

又曰海不讓水積水以成其大

又曰庶女告天

庶女少寡无子養姑者也姑無男有女女利母財而殺母以誣告寡婦不能自

解故告天也

雷霆下擊景公臺隕

景公齊景公也雷擊景公臺隕墜之也

肢體

傷折

景公為雷震所傷折

海水大出

又曰舟在江海不為莫乘而不浮君子行義不為莫知

而止休

孟子曰觀于海者難為水遊于聖人之門者難為言
抱朴子曰大廈既燔而運水于滄海此無及也

說苑曰齊景公遊海上而樂之六月不歸告左右曰敢
有先歸者致死不赦顏蠋進諫曰君樂海不樂治國彼
若有治國者君安得樂此海乎遂歸中道聞國人謀不
內之

法言曰百川學海而至于海丘陵學山而不至于山

山海經曰大荒中有山名曰天臺海水所入焉

又曰桂林八樹在賁海東

八樹而成林言其大也賁海今番禺隅也

又曰發鳩之山有鳥名曰精衛炎帝之女遊于東海溺而不返是故精衛常取西山之木石以填東海

周景式孝子傳曰管寧避地遼東遇風船人危懼皆叩頭悔過寧思惟讐咎念常如斲不冠而已向天叩頭風亦尋靜

神仙傳曰麻姑謂王方平曰自接待以來見東海三為

桑田向到蓬萊水乃淺于往者畧半也豈復將為陵陸乎

皇甫謐高士傳曰姜肱字伯淮十辟公府九舉有道皆不就靈帝時曹節白帝特徵肱隱身遯命浮桴入海名蓋天下

幽明錄曰海中有金臺山高百丈結構巧麗窮盡神工橫光巖渚竦曜星門臺內有金機彫文備制

十洲記曰扶桑在碧海之卯地一面萬里有大帝宮太

真東皇公所治處山外別有員海繞山員海水色正黑
謂之溟海無風而洪波百丈唯飛仙能到其處

玄中記曰天下之強者東海之沃焦焉水灌而不已沃
焦者山名也在海東三萬里

博物志曰舊說天河與海通近世有居海渚者年年八月
有浮槎去來往返不失期此人乃立屋于槎上齋糧乘
槎去忽不覺晝夜奄至一處有城郭屋舍望見室中多
織女見一丈夫牽牛渚次飲之問此人何由至此此人

即問此為何處荅曰君可詣蜀問嚴君平此人還問君平曰某月有客星犯斗牛即此人到天河也

崔鴻十六國春秋前燕錄曰慕容晃將東海討其弟仁襲其不意羣臣以凌道危阻宜從陸地晃曰舊海不凌自仁反以來三凍皆成昔光武合滹沱之冰以濟大業天其或者欲乘此而尅之乎吾計決矣沮謀者斬二月晃親率三軍擒仁賜死

東方朔十洲記曰祖洲東海中地方五百里上有不死

草生瓊田中草似菰苗人已死者以草覆之皆活

又曰扶桑在碧海中樹長數千尺一千餘圍兩幹同根更相依倚是以名扶桑

關令內傳曰天有五億五萬五千五百五十里地亦如之各以四海為脈

江

釋名曰江公也小水流入其中所公共也

說文曰江水出蜀湔氐徼外岷山

尚書曰岷山導江東別為沱

又說文曰江至會稽郡為浙江

毛詩曰江有沱江有汜

又曰滔滔江漢南國之紀

春秋元命苞曰牛女為江湖江湖者所以開神潤化故其氣湍急

家語曰楚昭王渡江有物大如斗圓而赤觸王舟舟人取之王大怪使之魯問孔子孔子曰此萍實也可剖而

食之吉祥唯霸者能獲之使返王遽食之甚美

謝承後漢書曰吳郡沈豐為郡主簿太守第五倫母老不能之官倫每至臘節常感戀垂泣遣豐迎母廣陵母見大江畏水不敢渡豐祭神令子孫對母飲酒因醉卧便渡

又曰吳郡王闔渡錢塘江遭風船欲覆闔拔劍斫水罵伍子胥風息得濟

續漢書曰張禹拜揚州刺史當過江行部中土人皆以

江有子胥之神難于濟涉禹厲聲言曰子胥如其有靈知吾志在理察枉訟豈危我哉遂鼓楫而過

魏志文帝伐吳至長江而歎曰天固以限南北也

晉書祖逖渡江中流誓曰逖不清中原而復濟者有如大江

又曰吳猛年四十邑人丁義始授神方因還豫章江波甚急猛不假舟楫以白羽扇畫水而渡

又曰王濬有奇畧武帝謀伐吳命濬造船于蜀其木柿

蔽江而下

又曰陶侃語人曰大禹聖人乃惜寸陰至于衆人當惜分陰叅佐以戲廢事者乃取其蒲博之具悉投于江
莊子曰魚相忘于江湖

孫卿子曰子路盛服見孔子孔子曰由是襜褕者何也
昔者江出汝山其始出源可以濫觴及其至江之津也不方舟不避風不可涉非唯下流大耶今汝衣服既盛顏色充盈天下且孰肯諫汝乎

三十國春秋曰劉裕次山陽聞何無忌敗績卷甲兼行將濟江而風急衆咸難之裕曰若有天命風當自息如其天不助舟覆溺何足怪即命登舟移時風止

董覽吳地記曰夫差時子胥以忠諫見怒遂賜死浮尸于江夫差悔焉與羣臣設祭于江

列仙傳曰江妃二女遊于江濱逢鄭交甫遂解珮與之交甫受珮而去數十步懷中無珮女亦不見

列女傳曰楚昭王貞姜者昭王夫人齊女也昭王出遊

留夫人漸臺江水大至遣使者迎夫人忘持符夫人曰
王與宮人約召必以符今使者不持符妾不敢行于是
使者返取符未還臺已壞沈水而流

又曰廣漢姜詩妻事姑至孝姑好飲江水水去家七里
妻常鷄鳴沂流而汲值風雪不能得水詩責遣之妻寄食
隣家紡績以市珍珠使隣母遺姑詩聞追還舍側忽有
涌泉出味如江水

華陽國志
又載

論衡曰儒書言伍子胥恨吳王驅水為濤而溺殺今會

稽錢塘丹徒江皆立子胥祠欲止其濤也

袁山松宜都記曰對西陵南岸有山其峯孤秀人自山
南上至頂俯臨大江如縈帶視舟船如鳬鴈

又曰大江清濁分流其水十丈見底視魚遊如采空淺
處多五色石

新序曰禹南濟于江黃龍負舟舟中之人皆失色禹仰
天而嘆曰吾受命于天死生命也龍俯首而逝

吳紀曰步騭表言北降人說北人多作布囊欲盛沙塞

大江吳王曰此曹必不敢來若不如孤言當以牛千頭
為君作閨後見呂岱說隲言北欲以囊塞江輒笑曰
此江自開闢以來寧可以囊塞乎

水經註曰昔吳郡太守張公直自九江守徵還道由廬
山子女觀祠女戲廟像其妻夜夢神人致聘覺言于夫
至明恐怖遽發船引中流而不行妻曰愛一女而闔門
受禍也公直不忍遂令妻下女于江其妻布席水上以其亡
兄女代之而船得進尋公直知兄女怒妻曰吾何面在

當世也復下已女於水中將渡遙見二女于岸側傍有一吏立曰吾廬君主薄敬君之義悉還二女

風俗通曰江貢也所出珍物可貢獻也

荊州記云江出岷山其源若甕口可以濫觴在益州建寧漏江縣潛行地底數里出楚都遂廣十里

老子曰江海所以能為百谷王者以其不逆衆流也苟有逆衆流不至多矣

太平御覽卷六十

欽定四庫全書

太平御覽卷六十一

宋 李昉等 撰

地部二十六

河

祥瑞沈祭
決塞附

淮

濟

河

釋名曰河下也隨地下處而通流也

山海經曰崑崙山縱廣萬里高萬一千里去蒿山五萬里有青河白河黑河環其墟其白水出其東北陬屈向東南流為中國河河百里一小曲千里一大曲發源及中國大率常然東流潛行地下至規期山北流分為兩源一出慈嶺一出于闐其河復合東注蒲昌海復潛行地下南出積石山西南流又東迴入塞過燉煌酒泉漲掖郡南與洮河合過安定北地郡北流過朔方郡西又南流過五原郡南又東流過雲中西河郡東又南

流過上都河東郡西而出龍門汾水從東于北入河東即龍門所在

呂氏春秋曰龍門未開河出孟門東大溢是謂洪水禹鑿龍門始南流至華陰潼關與渭水合又東迴砥柱砥柱山名河水分流包山而過山見水中若柱然今陝州東河北陝縣三縣界及洛陽孟津所在至鞏縣與洛陽水合成畢與濟水合濟水出河北至王屋山而南截河渡正對成皋又東北流過武德與沁水合至黎陽信都信都今冀州絳

水所在絳水亦曰潰水一曰漳水鉅鹿之北遂分九河鉅鹿今鄆州大陸所在大陸澤名九河一曰徒駭二太史三馬頰四覆釜五湖蘇六簡七絜八鉤盤九昂津又合為一河而入海齊桓公塞九河以廣田居故館陶貝丘廣川信都東光河間東城地九河舊迹猶存漢代河決金堤南北多罹其害議者常欲求九河故迹而穿之未知其所是以班固云自茲距漢已亡其八枝河之故潰自沙丘堰南分河出焉故尚書稱導河積石至于龍門今絳州龍門縣界

南至于華陰北至于砥柱東至于孟津在洛北都道所奏
古今以為津東過洛汭至于大伾洛汭今鞏縣在河洛合
流之所也大伾山今汜水縣即故成臯也山再成曰伾北
過絳水至于大陸其絳水今冀州信都大陸澤名今邢州
鉅鹿又北播為九河同為逆河入海是也同合出九河又
合為一名為逆河逆行也言海口有潮汐以迎河水

書曰九河既道

孔安國注曰河水分為九道

詩曰關關雎鳩在河之洲

又曰新臺有泚河水瀾瀾

又曰河水洋洋北流活活

又曰誰謂河廣一葦航之誰謂宋遠跂予望之

又曰不敢暴虎不敢馮河

大戴禮曰聖人有國則河不滿溢

禮斗威儀曰君乘土而王其政太平則河滿

宋君注曰河不災溢也

傳曰周詩有之曰俟河之清人壽幾何

詩逸詩也言人壽促而河清遲喻晉

之不可待也

又曰楚昭王有疾卜河為祟大夫請祭王曰江漢沮漳楚之望也河非所獲罪

春秋考異郵曰河者水之氣四瀆之精所以流化故曰河潤千里

孝經援神契曰河者水之伯上應天漢

史記曰秦滅六國自以為獲水德之瑞更名河曰德水漢書曰河有兩源一出葱嶺山一出于闐于闐在南山下其北流與葱嶺河合東注蒲昌海一名鹽澤

又曰長水校尉高茲言河決率常于平原東郡左右其地形下而土疏惡也聞禹理河本在此地以為水隈近察秦漢河決曹衛之域不過百八十里可空此地勿以為官亭民室

張璠漢紀曰郭伋為潁川太守光武詔曰賢能太守去帝城不遠河潤九里冀京城并蒙其福

魏志曰袁紹渡河沮授臨舟嘆曰上盈其志下務其功悠悠黃河吾其濟乎

說苑曰甘茂使齊渡河船人曰河水猶澗耳君不能渡
何王之能說乎甘茂曰持楫隨流臣不若子說萬求之
君子不如我

桓譚新語曰大司馬張仲議曰河水濁一石水六斗泥
而民競決河溉田今河不通利至三月桃花水至則決
以其噎不泄也可禁民勿復引河

韓詩外傳曰申屠狄非其世將自投於河崔嘉聞而止之
曰聖人民之父母也今為濡足之故不救溺人可乎申

屠狄曰昔桀殺龍逢紂殺比干而亡天下吳殺子胥陳殺泄冶而滅其國非無聖知不用故也遂負石而沈于河

河圖始開圖曰黃帝問風后曰余欲知河之始開風后曰河凡有五皆始開乎崑崙之墟

慎子曰西河下龍門其流駛竹箭

挹朴子曰撮壤不能填決河升水不能冷原火

又寸膠不能理黃河之濁尺水不能却蕭丘之火

淮南子曰武王伐紂至孟津陽侯之波逆流而擊疾風晦暝人馬不相見于是武王左操黃鉞右執白旄瞋目而麾曰余在天下誰敢害余者於是風濟波罷

又河以委蛇故能遠山以陵遲故能高道以優游故能化

又河九折注海而流不絕者有崑崙之輸也

風俗通曰河播也播為九州也

物理論曰河色黃衆川之流蓋濁之也百里一小

曲千里一大曲一直一曲九曲以達於海

山海經曰從極之淵深三百仞唯冰夷恒都焉

冰夷馮夷也淮

南子曰馮夷得道以潛大川

馮夷人面乘兩龍

乘雲車駕二龍

水經注曰禹理洪水觀於河見白面長人魚身出曰吾

河精也授禹河圖而還于淵

又曰昔澹臺子羽齎千金之璧渡河陽侯波起兩蛟挾舟子羽曰吾可以義求不可以威劫操劍斬蛟蛟死波休乃投璧于河三投而輒躍出乃毀璧而去示無恠意

又崑崙在北去嵩高五萬里地之中也高萬一千里河水出其東北

蕭廣濟孝子傳曰三洲人者各一洲人皆孤單歿獨三人間會樹下息因相訪問老者曰寧可合為斷金之業邪二人曰諾即相約為父子因命二人于大澤中作舍且欲成父曰此不如河邊二人曰諾河邊舍幾成父曰又不如河中二人復填河二旬不立有一書生過之為縛兩土脍投河中會父往呼止之曰嘗見河填耶觀汝

行耳相將而去明日俱至河邊望見河中土高丈餘

祥瑞

河附

禮記曰河出馬圖言龍馬負圖也

河圖曰黃帝曰余夢見兩龍授圖乃齋往河洛而求有魚折流而止魚汎得圖跪而受之

運斗樞曰舜與諸侯觀河洛有黃龍負圖出置帝前

覺入水而前去

覺之遊反又音帶覺去也

拾遺記曰黃河千年一清聖人之大瑞也

易乾鑿度曰帝王將起河水先清清變白白變赤赤變黑黑變黃各三日

中候曰榮光出河休氣四塞榮光即五色
論語曰河不出圖吾已矣夫

沈祭

河附

穆天子傳曰天子西狩獵獲白狐玄貉以祭于河

禮記曰三王之祭川也皆先河後海此所以務本言海
之本源自河也

史記曰元光中河決于瓠子于是天子臨決河沈白馬
玉璧于河令羣臣從官自將軍以下皆負薪填決河而
取淇園之竹以為堰天子既臨決河悼功之不成乃作
瓠子之歌

決塞

河附

穀梁傳曰梁山崩壅河三日不流晉君召伯尊伯尊遇
輦者問焉輦者曰君親素縞帥羣臣哭之既而祠焉伯
尊至君問之伯尊如其言而河流矣

左傳曰
伯宗

漢書曰成帝時河決潰金隄凡灌四郡河隄使者王延
世塞以竹落長四丈大九圍盛以小石兩船夾載而下
之三十六日河隄成改元為河平

又賈讓奏言治河有上中下三策若徒其當水衝之人
以避之放河使北入海汎濫期月自定不勞人力此功
一立河定人安千載無患謂之上策若多穿漕渠使人
得以溉田雖非聖人法然亦救敗術也今據堅地作石
隄東西水門但用木與土耳旱則開東方水門以溉田

水則開西方高門以分河此誠富國安民興利除害謂之中策苟繕完故隄增卑培原勞費無已數逢此害謂之最下策也

又武帝元光中河水決頗丘發卒十萬救決河起龍淵

宮

武廟也自作之故言宮

呂氏春秋曰故龍門未開呂梁未發河水來孟門大溢逆流名曰洪水禹乃決江疏河為彭蠡之障所活者千八百國此禹之功

文子曰江河之大溢不過三日

水經注曰漢平帝之世河汴決壞未及得修汴渠東侵日月彌廣門閭故處皆水中也

漢明帝永平十二年議治汴渠上乃引樂浪人王景問水形便景陳利害應對敏捷帝甚善之乃賜山海河渠書禹貢圖及以錢帛發卒數十萬詔景與將作謁者王吳治渠築隄防修竭起自滎陽東至千乘海口千有餘里景乃商度地勢鑿山開澗防遏衝要疏決壅積十里

一門水更相迴注無復潰漏之患明年渠成帝親自巡行詔濱河郡國置河堤員吏如西京舊制由是顯名王吳及諸從事者皆增秩一等順帝陽嘉中又自汴河口以東緣河積石為堰通淮曰金堤靈帝建寧中有增修石門以遏渠口水盛則通注津耗則輟流

淮

春秋說題辭曰淮出桐栢淮者均也均其務

釋名曰淮圍也圍繞揚州北界東至海

廣雅同

說文曰淮出南陽平氏桐栢大復山東南水經注及山海經云淮水出南陽平氏縣桐栢山其源初則涌出復潛流三十里然後長驚東北經大復山從義陽郡北東過江夏平春縣北又東過新息縣南期思縣北至原鹿縣南與汝水合又東過廬江安豐縣與決水合東北至九江壽春縣與潁水合壽春縣東北與淝水合又東至當塗縣北與渦水合東北至下邳淮陰縣與泗水合東至廣陵淮浦縣而入海也近海數百里通朝夕潮尚書

稱導淮自桐柏東會于泗沂東入于海是也

書曰淮沂其乂

又曰泗濱浮磬淮夷蠙珠

周禮曰橘踰淮而北為枳此地氣然也

詩曰率彼淮浦省此徐土

孟子曰禹排淮泗而注之江

焦貢易林曰江河淮海天之奧府衆利所聚可以饒有
劉向說苑曰莊周貧往貸于魏文侯文侯曰待吾邑粟

之來而奉之周曰乃今者周之來見道牛蹄中有鮒魚
焉太息謂周曰我尚可活也周曰須我為汝向南詣楚
王決江淮以溉汝鮒魚曰今命在盆甕之中耳乃為我
見楚王決江淮以溉我汝即索我于枯魚之肆矣

晉陽秋曰秦始皇東遊望氣者云五百年後金陵有天
子氣於是始皇改曰秣陵塹北山以絕其勢今建康即
秣陵西北界所塹即建康南淮也

今謂之
秦淮

淮南子曰夫醉者超江淮以為尋常之溝也

濟

釋名曰濟濟也言源出河北濟河而南也

水經注及山海經云濟水出河東垣縣王屋山初名沆水

風俗通云濟水出常山房子縣贊皇山北又別是一水耳應氏以為流入濟者非也東出溫縣西北始名濟水孔安國注尚書曰發源為沆流去為濟在溫西北平地又東南流當鞏縣之北而南入河與河並流過大伾成

臯成臯今汜水縣

晉書地道志曰濟自大伾入河與河水鬪大伾成臯古成臯兼包鞏縣之界溢出為滎水東流過陽武及封丘縣又東過宛胸縣南至定陶縣南又東北流與荷水會東至乘氏縣西分為二其一東北流入鉅野澤過壽張西而與汶水合又北過穀城縣西又東北過盧縣北經濟郡東萊郡而入海也尚書稱導沅水東流為濟河水所經也又東北會于汶又北東入于海是也

淮南子曰濟水通河宜麥

風俗通曰濟水出常山房子贊皇山廟在東郡林邑縣
濟者齊也齊其度量也

戴延之西征記曰濟水自大伾入河與河水鬪而東流
劉向說苑曰四瀆江河淮濟何以視諸侯能蕩滌垢濁
焉能通百川于海焉能蕩出雲雨焉為德甚美故視諸
侯

周禮冬官曰鸛鴈不踰濟地氣然也

左傳曰鄭伯之車僨于濟

韓子曰清濟濁河足以為限長城巨防足以為塞齊五戰之國也

太平御覽卷六十一

欽定四庫全書

太平御覽卷六十二

宋 李昉等 撰

地部二十七

涇

渭

灞

涇

豐

鎬

滂

滴

伊

洛

瀍

澗

穀

漢

沔

涇

書禹貢曰涇屬渭汭

屬連屬也北海曰汭言治水注入渭

詩曰涇以渭濁湜湜其沚

傳曰諸侯之大夫從晉侯伐秦以報櫟之役濟涇而次

秦人毒涇上流師人多死

國語曰恭王遊于涇上密康公從有三女奔之其母曰
必致之于王夫獸三為羣人三為衆女三為粲粲美之
物汝何德以堪之康公弗許一年恭王滅密

史記曰韓聞秦之好興事乃使水工鄭國間說秦令鑿
涇水自中山西抵郿口為渠以溉田

又秦二世夢白虎噬左驂殺之卜涇為祟二世乃齋望
夷宮而欲祀之

漢書曰涇書不在大川之祀以近咸陽得比大川之祀

又太始二年趙中大夫白公

鄭德曰白姓公爵時人多謂為相公

復奏穿

渠因名白渠民得其饒歌之曰田於何所櫟陽谷口鄭

國在前白公起後舉鍾為雲決渠為雨涇水一石其泥

數斗且溉且糞

如淳曰水停於河以當糞

長我禾黍衣食京師億萬

之口

益部耆舊傳曰漢武祀甘泉至涇橋有女子浴于涇水乳長七尺怪遣問之女曰帝後第七車知我時侍中張

寬在第七車對曰天星主祭祀齋戒不潔則女人星見
水經注曰涇水導源安 朝那縣西開頭山秦始皇巡
地西出開頭山即是山也蓋大隴之異石

渭

詩曰我送舅氏曰至渭陽

史記曰秦武王三年渭水赤三日昭王十四年又赤三
日

洪範五行傳曰赤者火色蓋亦以火沴水也渭水秦大

川也陰陽亂秦用嚴刑敗亂之象

史記曰西伯獵遇太公渭之陽與語大悅

漢書曰武帝元光六年春穿漕渠通渭

山海經曰渭水出鳥鼠同穴山東注河入華陰北

鳥鼠同穴

山今在隴西首陽縣渭水出其東經南安天水畧陽扶風始平京兆至弘農華陰縣入河也

三輔黃圖曰始皇兼天下都咸陽渭水貫都以象天河
水經注曰渭水中舊有付留神像此神嘗與魯班語班
令其人出付留曰我貌醜卿善圖物容我不能出班於

是拱手與言曰出頭見我忖留乃出首班於是以脚畫地忖留覺之便還沒水故置其像于水中唯背以上立水上

三輔決錄項仲山飲馬渭水日與三錢以償之

列子曰夸父逐日渴飲渭水不足乃渴死

淮南子曰渭水多力宜黍

霸

水經注曰霸者水上地名也水東合漚水過白鹿原至

秦虎圍北入渭

漢書地理志曰霸水出藍田谷古曰滋水秦穆公更名霸水以彰霸功

漢書曰漢王元年十月至霸上秦王子嬰降

澧

水經注曰澧水出京兆藍田谷北入于霸

地理志曰澧水出南陵縣之藍田谷西北流與一水合水出西南莽谷東北流注澧水又北歷藍田川北流注

于霸水又云北至霸陵入霸水也

西京記曰西京東市平準署東隅有放生池分漚水渠
自道政坊東城西流注之俗號海池

又曰漚水西岸阪舊名漚阪隋文帝惡阪之名改名長
樂阪

豐

漢書地理志曰漆沮既從豐水攸同顏師古注曰豐水
出鄠之南山言沮水既從入渭豐水亦同來也

水經注曰渭水與豐水會短陰山無他高山異巒唯東原阜石墩而已水上舊有便門橋

毛詩文王有聲曰豐水有芑武王豈不仕貽厥孫謀以燕翼子

文子曰老子云豐水之深十仞而不受塵垢金鐵在中形見于外

鎬

水經注曰鎬水上承鎬池於昆明池北周武王之所都

也故詩云考卜維王宅是鎬京維龜正之武王成之鎬
水又北流與漉池合又北經清泠臺西逕慈石門注于
渭鄭玄曰豐鎬之間水北流也

澇

說文曰澇水出扶風鄠北入渭

山海經曰牛首之山澇水出焉下注于潏水多飛魚

潏

字林曰潏水出杜陵縣

水經注曰滴水上承皇子陂水逕漸臺東入渭亦名沈水又名高都水漢王氏五侯大治池宅引高都水入長安城故百姓歌之曰五侯初起曲陽最怒決壞高都逕連五杜土山漸臺象西白虎是也

伊

水經曰伊水出南陽魯陽縣西蔓渠山

左僖二十二年平王東遷也卒有適伊川

杜預注曰卒有周大夫也

見被髮而祭于野者曰不及百年此其戎乎

山海經曰獨蘇之山伊水出焉東流注于洛

今伊水出上洛盧氏

縣熊耳山東北至河南洛陽縣入洛

戴延之西征記曰伊水上源經新城陸渾二縣男女無少長皆病癭俗云水土所致伊水不可飲也

呂氏春秋曰有莘氏女子採桑得嬰兒桑中其母居伊

水上故命之曰伊尹

伊尹母化為空桑

洛

水經注曰洛水出京兆上洛縣護舉山

地理志曰洛水出冢嶺山

易繫辭曰洛出書聖人則之

易乾鑿度曰王者盛德之應洛水先溫九日乃寒五日
變為五色

又帝王將起河洛龍見察其首黑者人正白者地正赤
者天正

禹貢曰導洛自熊耳在宜陽之西東北會于澗瀍會于河南城南又

東會于伊會于洛陽之南又東北入于河合于鞏之東也

尚書中候曰武王祀璧于河禮畢退至日旰榮光幕河
青雲浮洛

毛詩曰瞻彼洛矣維水泱泱

春秋說題辭曰洛出熊耳山雒之為言繹其耀也

宋均注曰

水光
輝也

國語曰靈王二十二年穀洛鬪將毀王宮王欲壅之太
子晉曰夫山土之聚也藪物之歸也川氣之導也澤水
之鍾也夫水聚于高歸于下今吾執政無乃實有所僻

而滑夫三川之神王卒壅之王室大亂

又曰伊洛竭而夏亡三河竭而商亡

漢書曰武帝穿渠引洛水岸遂崩乃鑿井深四十餘丈
往往為井相通行水

謝承後漢書曰沛國陳宣建武十年雒水出造津城門
或欲築塞之宣諫曰昔王尊正身金堤水退況聖主耶
言未絕而水去

水經注曰昔黃帝之時天大霧三日帝避洛水之間見

大魚殺五牲以醺之天乃甚雨七日七夜魚流始得圖
書

魏畧曰漢火行忌水故洛去水而加佳焉

山海經云秦中之山洛水出焉東注于河其中有藻玉
述征記曰洛水底有礪石故上無水

瀍

水經曰瀍水出河南穀城縣北東與千金渠合又東過
偃師入于洛

澗

水經曰澗水出新安縣南白石山東南入于洛

三輔決錄注云馬氏兄弟五人共居澗穀二水之交作五門客舍因舍以為名今在河南西四十里以山海經推校里數不殊仲治所記水會尚有故居之處所則澗水也即周書所謂我乃卜澗水東是也

穀

水經曰穀水出弘農澠池縣南嶠冢林穀陽谷也

山海經曰博山之西有林焉曰蟠冢穀水出焉東流注于洛其中多璆玉今穀水出于嶠東馬頭山谷陽谷東北流歷澠池川

常昭語注曰洛水在南穀水在王城北東入于瀍水靈王時穀水盛出于王城西而南流合于洛兩水相格有似乎鬪而投王城西南也

漢沔

禹貢曰江漢朝宗于海

詩序漢廣德廣所及也文王之化被乎南國美化行乎
江漢之域

又曰滔滔江漢南國之紀

又曰南有喬木不可休息漢有游女不可求思

左傳曰蔡昭侯為兩珮與兩裘以如楚獻一珮一裘于
昭王子常欲之不與三年止之蔡侯歸及漢執玉而咒
曰余所濟漢而南者有若大川

又曰楚國方城以為城漢水以為池

又曰吳師伐郢楚子常濟漢而陣自小別至于大別
蜀志少府王謀等上言前襄陽男子張嘉王休獻玉璽
璽潛漢水於深淵暉景燭曜璽光徹天

孫爚宋書曰漢中成固縣漢水岸際有異聲如雷俄頃
岸崩有銅鐘十二出自潛壤體制既精扣之清響

韓詩曰鄭交甫過漢皋二女妖服珮兩珠交甫與之遇
言曰願請子之珮二女解珮與交甫而懷之去十數步
探之則亡矣迴顧二女亦即亡矣

水經注及山海經注云漢水出隴坻道縣嶠冢山初名

漾水東流至武都沮縣始為漢水東南至葭萌與羗水

合至江夏安陸縣名沔水故有漢沔水之名

周昭王溺于此處

又東至竟陵合滄浪之水

即屈原遇漁父處

又東過三澨水觸

大別山南而入江也

庾仲容漢水記曰漢水出廣漢漾水出隴西東流至武都而與漢水

合沔水出武都沮縣與漢水相合

東為滄浪之水過三澨至于大別南

入于江東匯澤為彭蠡東為北江入于海是也

匯迴也音胡洧

反言漢水合大江迴流入彭蠡東北至南徐州名為北江而入海

又曰沔水東經萬山北山下有潭中有杜元凱碑元凱
好尚後名作兩碑並述已功一碑立峴山一碑沈此潭
中曰千載之後何知不深谷為陵也

又曰漢東經西城縣故城為鱣湍洪波潏潏瀾浪雲頽
古者舊言有魚奮鬐望濤直上至此曝腮因以名鱣湍
焉

又曰漢水經西城縣南又東城為龍泉泉上有胡鼻山
石類胡人鼻故也下臨龍井渚泉深數丈

盛弘之荊州記曰沔水隈潭極深先有蛟為害鄧遐為襄陽太守拔劍入水蛟繞其足遐自揮劍截蛟數段流血丹水勇冠當時于後遂除蛟患

又曰荊蘊玉以潤其區漢含珠而清其域

梁州記曰漢水發源隴西氐道縣之嶓冢山東至夏口合江綿帶四州之域經塗五千餘里謂之沔水

水經曰沔水出武都沮浪谷中注曰一名沮水以其初出沮洳然也

淮南子曰漢水重安而宜竹箭

太平御覽卷六十二

欽定四庫全書

太平御覽卷六十三

宋 李昉等 撰

地部二十八

河南諸水

孝水

橐水

涑水

菊花水

渰水

澧水

汝水

潁水

丹水

白水

灌水

潏水

洧水

京水

索水

濮水

隕石水

呂梁水

濠水

汭水

睢水

泗水

洙水

沂水

澠水

汶水

沐水

淄水

澠水

孝水

山海經曰平逢山西十里龐山其陽多瑋琇之玉俞隨之水出于其隈北流注于穀世謂之孝水也

潘岳西征賦曰澡孝水以濯纓嘉美名之在茲

橐水

陝縣圖經曰橐水即魯水也西北入城百姓賴之呼為利人渠是也又按唐史云武德元年陝東道行臺金部郎中長孫操自郡東又引水入城以代井汲百姓賴之與上渠俱利于民

涑水

十道志曰涑水亦名襄水荆楚之地水駕山而上者皆呼為襄上也今土人呼涑水上流亦為襄名既無定故

陸澄地理志曰襄陽無襄水也又按襄沔記曰中廬有
涑水注于沔此水中有物如三四歲小兒膝頭如虎掌
爪常沒水中出膝頭示人小兒不知者欲弄之輒欲啖
人

菊花水

荊州記曰菊花源傍悉生芳菊被徑浸潭流其滋液水
極芳馨谷中有三十餘家不穿井仰飲此水上壽二三
百中壽百餘七八十者猶不為壽夫菊能輕身益氣令

人久壽于此有徵矣又後漢胡廣字伯始為侍中久患風羸南歸飲此遂瘳焉

漁水

傳曰晉陽處父侵蔡楚子上救之與晉夾漁而軍

張衡南都賦曰爾其川瀆則漁澧灤澗發源巖穴布獲汗漫漭沆洋溢總括趨欲箭馳風疾

水經曰漁水出南陽魯陽縣西之堯山

又曰漁水又東南經昆陽縣故城昔漢光武與王尋王

邑戰昆陽敗走者相騰踐奔殪百餘里會大雨如澍淦川盛溢虎豹皆股戰士卒爭赴溺死者以萬數水為不流王邑嚴尤陳茂輕騎皆乘尸而渡

澧水

說文曰澧水出南陽經衡山東入汝

山海經曰葛山澧水出焉

澧音禮

東流于余澤其中多六

足魚

漢書地理志曰充縣厯山澧水出焉

離騷云沅有芷兮澧有蘭

又有澹水王仲宣贈孫文始詩云悠悠澹澧是也

汝水

說文曰汝水出弘農盧氏還歸山東入淮

春秋說題辭曰汝出猛山汝之為言女也宋均注曰女取其生孕也

毛詩汝墳道化行也文王之化行乎汝墳之國

水經曰汝出河南梁縣兔鄉西天息山注曰地理志云

出高陵山即猛山亦言出魯陽縣之大猛山博物志云
出燕泉山並異名也

東觀漢記曰傅俊從上迎擊王莽之軍于陽關漢兵反
走還到汝水上于水岸以手飲水澡頰塵垢謂俊曰今
日罷倦甚諸卿寧憊耶

潁水

說文曰潁水出潁川陽城乾山東入淮豫州浸也
水經注曰潁有三源右水出陽乾山之潁谷中水道源

少室左水出少室南谿

漢書曰灌夫潁川人宗族豪橫潁人謠曰潁川清灌氏
寧潁水濁灌氏族

韓子曰鄭人有卜子妻市買鼃歸過潁川以鼃為渴飲
之遂失鼃

呂氏春秋曰湯讓天下於卞隨卞隨自投于潁水

丹水

漢書曰高祖入關王陵起兵丹水以歸漢

水經曰丹水出京兆上洛縣冢嶺山至丹水縣入于汧
呂氏春秋曰堯有丹水之戰以服南蠻注曰水出丹魚
先夏至十日夜伺之魚浮水側赤光上照如火網而取
之割其血以塗足可以步行水上長居淵中

尚書逸篇曰堯子不肖舜使居丹淵為諸侯故號曰丹
朱

白水

水經曰白水出朝陽縣西東流過淇縣南至新野縣東

入于渭

東觀漢記曰光武皇考封南陽之白水鄉

莊子曰兩神女于白水之上禹過趨而問之曰治天下

奈何女曰股無胼脛無毛手足胼胝何足以至

司馬彪注云言

憂天下太甚也

灌水

水經注曰灌水經蓼縣褚先生所謂神龜出于江灌之

間是也

潯水

說文曰潯水出鄭國

水經注曰潯水出鄆城西北鷄絡塢下東南流入于洧

潯字今
作潯

詩曰子惠思我褰裳涉潯子不我思豈無他人

又曰潯與洧方渙渙兮士與女方秉簡兮

孟子子產聽鄭國之政以其乘與濟人於潯洧

洧水

說文曰洧水出潁川陽城山東南入潁水經云出密縣馬嶺山注云洧別源也

詩曰子惠思我褰裳涉洧子不我思豈無他士

傳曰鄭大水龍鬬于時門之外洧淵

京水

水經注曰京水發源京縣黃堆山東亦名祝東泉勢沸湧俗謂之京水也

索水

水經注曰索水出京縣西南崇渚與山關水同源分流
即古旃然水也左傳謂楚伐鄭次旃然即此水也

史記曰漢王敗于彭城韓信擊破水兵于京索間以故
項羽不能西

濮水

說文曰濮水出東郡濮陽南入鉅海

水經曰瓠子河東北過廩丘縣為濮水

史記曰晉平公令師涓鼓琴未終師曠止之曰亡國之

音也平公曰是何道出答曰此師延所作與紂為靡靡之樂武王伐紂師延東走自投濮水之中故聞此聲必于濮水之上凡聞此聲者國削問果于濮上得之

莊子釣于濮水楚王使大夫二人先焉曰願以境內為累莊子持竿不顧也

隕石水

水經注曰睢陽有隕石水一名漆溝左傳云隕石于宋五隕星也故老云此水有時竭涸五石存焉故名隕石

水墜處為澤

呂梁水

述征記曰彭城呂梁縣有呂梁水即莊子所稱丈夫水

列子曰孔子觀呂梁懸水三十仞流沫三十里鼃鼃魚
鼃不能游之數百步而出被髮行歌

莊子亦載

濠水

水經注曰濠水出陰陵縣之陽亭北小屈石穴北注于淮
莊子曰莊子與惠子遊于濠梁水上

汧水

正萬切

水經注曰汧水出陰溝至浚儀縣北入睢水注云陰溝即浪蕩渠也亦言汧受旃然水又云丹沁亂流于武德絕河入南陽合汧故兼丹水之稱河湧水斷汧承旃然而東自王賁灌大梁水出縣南而不繞其北夏水洪汎則是瀆津通故渠即陰溝也於大梁北又曰浚水矣故陳畱風俗傳云浚水延其北者也

睢水

漢書曰項羽與漢王戰于靈壁東漢軍大敗睢水為之不流

地理志曰睢水首受陳留縣浪蕩渠

水經曰睢水首經睢陽縣又東過相縣南流曲折而後入淮

又曰睢水又東經睢陽縣故城南積而為蓬洪澤也九州要記云睢陽水在宋城西

又云漢水經新城南東合明溝水

傳曰睢渙之間出文章天子郊廟御服出焉尚書所謂厥篚織文者也

泗水

說文曰泗水受濟水東入淮

禮曰魯子謂子夏曰吾與爾事夫子于洙泗之間退而老于西河之上

漢書地理志曰洙泗之水其民涉渡幼者扶老及魯道衰洙泗之間斷斷如也

論衡曰儒書言孔子葬泗水泗水為之却流此虛也泗水無知天神使之却流孔子生時何不使之尊敬乎地理志曰泗水出濟陰乘氏縣又云出卞縣地經言北山皆為非矣

水經注曰泗水出魯東北余昔因公事沿厯徐沅路經洙泗因令尋其源流水出卞縣故城東南桃墟西北按春秋昭公七年謝息納季孫之言以孟氏成邑與晉而遷于桃杜預曰魯國卞縣東南桃墟世謂之曰陶墟舜

所陶處也井曰舜井皆為此也墟有漏澤方一十五里其西有阜俗謂之媯亭山蓋有陶墟舜井之言因復有媯亭之名矣阜則有二石穴廣圓三四尺穴有通否水有盈漏漏則數夕之中傾陂竭澤矣左右居民識其將漏豫以木障穴口魚鼈介鱗不可勝載矣自此連岡通阜西北四十里許岡之西際便得泗水之源也又張華博物志曰泗水陪尾蓋斯阜也石穴吐水五泉俱導泉穴各徑尺餘水源南側有一廟松栢成林時人謂之源

泉祠非所究也

又漢景帝三年有白頸烏與黑烏群鬪于呂縣白頸烏不勝墮泗水中死者數千

洙水

水經曰洙水出濰山蓋縣臨樂山西南至汴縣入于泗注云洙水出濰山而南流盜泉水注云泉出卞城東北卞山之陰

論語考識曰水名盜泉仲尼不漱

又注曰夫子教于洙泗之間今于城北二水之中即夫子設教之所也

從征記曰洙泗二水交於魯城東北十七里闕里有洙泗牆南北一百二十步東西六十步四門各有石閘北門去洙水百餘步

沂水

說文曰沂水出東海費縣入泗一曰出泰山青州浸也水經曰沂水出泰山蓋縣艾山注曰鄭康成云出沂山

臨山水有二源南導源世謂之祚泉山北水所發俗所謂魚窮泉俱東南流合成一川

論語曰莫春者春服既成冠者五六人童子六七人浴乎沂風乎舞雩詠而歸

西京雜記曰魯人秋胡娶妻三日而遊宦三年休還其婦採桑于郊胡至不識而悅之乃遺以金妻曰妾夫遊宦未返于茲三年未有被辱如今日也不顧胡慙而退至家問妻何在母曰採桑于郊乃是向來挑者也夫妻

俱慙遂赴沂水而死

尸子曰韓雉見申羊于魯有龍飲于沂韓雉曰吾聞之
出見虎搏之見龍射之今弗射是不行吾聞也遂射之
郡國志曰沂水今號為長利圯上有橋即張良為黃石
公取履所

澠水

水經注曰澠水導源澠山許慎云澠水出箕屋山

淮南子曰澠水出覆舟山蓋廣異名也

史記曰韓信與楚將龍且夾濰水而陳韓信乃夜令為萬餘囊盛沙以遏濰水引軍擊且偽退且追北信決水水大至且軍半不得渡遂斬龍且

汶水

說文曰汶水出琅琊泰山朱虛東入濰又云出泰山萊蕪西南入濟

從征記曰汶水出萊蕪縣之西南又言自萊蕪谷夾路連山數百里水黑多行石澗中出草藥松柏林葱鬱蒙

翳崖壁相望或傾岑岨徑或迴巘絕谷有風鳴條山壑
俱響陵高降深魚喘慄之懼危溪險徑有懸束之艱未
出谷十餘里有別谷在狐山下谷有清泉泉上數丈有
石穴二口容人平行入穴丈餘高九尺餘廣四五丈言
是昔人居山之處薪爨烟黝猶存谷中林木緻密行人
鮮有能至者又有少許山田引灌之蹤尚存出谷有平
丘面山傍水土人悉以種麥云此丘不宜殖稷與黍而
宜麥齊人相承以殖之

詩曰汶水湯湯行人彭彭

周禮考工記曰貉踰汶則死地氣然也

論語曰季氏使閔子騫為費宰閔子騫曰善為我辭焉如有復我者則吾必在汶上矣

傳曰齊人歸我汶陽之田

沫水

水經云沫水出琅琊東莞縣西北山東南經東海厚丘縣梁天監二年三月土人張高等五百餘人相率開鑿

此溪引溉水田二百餘頃俗名為紅花水東流入泗州連水界

溜水

水經曰溜水出泰山萊蕪縣原山注云世謂之原泉

淮南子曰溜澗之水合易牙嘗而知之

溜澗濟二水也

新序曰齊有田巴先生者行修于內智明于外齊君聞其賢聘而問政焉田巴對曰政在正身正身之本在于羣臣大王召臣臣改制前飾將造公門問於臣妾曰奚

若妾愛臣曰美將出門問從者從者畏臣曰美及臨淄水而觀影然後自知醜惡也今齊之臣妾諛王者非特二人王如臨淄水見已之惡過而能改斯齊國治矣

澠水

水經注曰澠水出營丘城東世謂之漢溱水入于時水傳曰有酒如澠

太平御覽卷六十三